



Peter Olsen  
Inatsisartunut ilaasortaq, Inuit Ataqtigiit

**Qimussinik sukkaniuttarnerit pillugit – § 37 naapertorlugu apeqqummut nr. 219/2024-mut akissut**

21-10-2024  
Suliap normua: 2024 - 1595  
All. nr. 24656895

Asasara Peter Olsen,

Postboks 1029  
3900 Nuuk  
Oqarasuaat: +299 34 50 00  
Mail: ikin@nanoq.gl  
www.nanoq.gl

Inatsisartut suleriaasiat naapertorlugu apeqqummut qujanaq. Apeqquqtigineqartut tullinguuttuni akissuteqarfigissavakka.

**Apeqquq 1:**

**Nunatta karsiata tapiissuteqartarnerata saniatigut kommuneqarfiit qimussersuarmut peqataatitaqartuusut qimussertartut peqatigiiffiinnut angalanissamut tapiissuteqartarnerisut Naalakkersuisut ilisimasaqarfigivaat?**

**Akissut:**

Apeqquq 1, a aamma b akisinnaajumallugit Naalakkersuisut kommuninut saaffiginissimapput qimussinik sukkaniunnersuarmut peqataanissamut najukkani peqatigiiffiit kommuninut tapiiffigineqartarnerinut tunngasunik Naalakkersuisut paasissutissaateqanngimmata. Kommuneqarfik Sermersooq, Avannaata Kommunia aammalu Qeqqata Kommunia paasissutissanik nassitsisimapput, kommunilu kingulleq qimminik qimuttoqarfilik, Kommune Qeqertalik, akissuteqarsimanani.

**a. Aappiuppat, ukiuni kingullerni marlunni qanormita annertutigisumik kommuunit tapiissuteqarsimappat?**

**Akissut:**

Kommuneqarfik Sermersuup ilisimatitsissutigaa Kalaallit Nunaanni Qimussertartut Kattuffiata (KNQK) Tasiilami immikkoortortaa kulturikkut sammisassaqaartitsinissanut qinnuteqareernerata kingorna 2023-mi 50.000 kr.-inik tapiiffigineqarsimasoq. Peqatigiiffiup siunertai suliniutaalu Kommuneqarfik Sermersuup kulturikkut tapiissuteqarnissamut piumasaqaataanut naapertuummata, tassalu Tasiilami ileqqutoqqat attatiinnarnissaanut nukittorsarnissaanut suliniuteqartoqarniarmat tapiiffigineqarsimapput.

KNQK Ittoqqortoormiit aamma KNQK Tasiilaq 2024-mi katillugit 100.000 kr.-inik tapiiffigineqarsimapput. KNQK Ittoqqortoormiit tapiiffigineqarnissamik siullermeerluni 2024-mi qinnuteqarpoq. Peqatigiiffiit qinnuteqartut marluusut peqatigiiffiit kulturikkut ileqqutoqqanik attassiinnarniarnerat najukkanilu pingaaruteqassusaat aallaavigalugit tapiiffigineqarput.

Avannaata Kommunia ilisimatitsivoq Avannaata Kommunia 2023-mi qimussertartut peqatigiiffiit tallimanut katillugit 283.514 kr.-inik tapiissuteqarsimasoq: Tiiarut, Qeqertaq; Qimussersaq 71, Ilulissat; Ujaloq 88, Upernavik Kujalleq; Orseq 87, Innaarsuit.

Avannaata Kommunia kommunip tapiissuteqartarnermut ileqqoreqqusaa naapertorlugu tassalu Avannaata Kommuniata tapiissuteqartarnermut ileqqoreqqusaani 2023-meersumi, § 7, imm. 1 naapertorlugu qimussiussisartut angalanerinit tapiissuteqartarnikuvoq.

Avannaata Kommunia 2024-mi katillugit 395.300,05 kr.-inik qimussertartut peqatigiiffiit tallimanut tapiissuteqarsimavoq: Suloraq 90, Saqqaq; Qimussersaq 71, Ilulissat; Suloraq 84, Saattut; Suloraq 87, Nuussuaq; Qimuggeq, Qaanaaq.

Avannaata Kommunia tapiissuteqartarnermut ileqqoreqqusaani 2024 § 4, imm. 4 naapertorlugu Avannaata Qimussersuanik Avannaatalu Qimussersuaaraanik 2024 aqqissuisumut Qimussersaq 71-imut 80.000 kr.-inik tapiissuteqarsimavoq. Tamatuma saniatigut Avannaata Kommuniata tapiissuteqartarnermut ileqqoreqqusaani 2024 § 8, imm. 4 naapertorlugu qimussertartut angalanerinit Avannaata Kommunia tapiissuteqartarnikuvoq.

Qeqqata Kommuniata ilisimatitsissutigivaa Qeqqata Kommunia Avannaata Qimussersuortoqarnissaanut atatillugu ukiut tamaasa Qimuseq Sisimiunut tapiissuteqartarpoq. 2023-imi 2024-milu ukiumut tapiissutigineqarsimapput 50.000 kr.-it.

Tassunga ilanngullugu ilisimatitsissutigineqarpoq ukioq 2023 sioqqullugu ukiumut 230.000kr - 280.000 kr. akornanni annertutigisumik Qimuseq Sisimiut Qeqqata Kommuniat tapereqartarsimasoq. Nunatta karsiata Avannaata Qimussersuanut tapiissuteqartarnera, 2023-imi Qeqqata Kommuniata eqqumaffigillualernerata kingorna, Qeqqata Kommuniata Qimuseq Sisimiunut tapiissuteqartarnera 2023-2024-mi annikillisinneqarnikuvoq.

**b. Kommuunit qanoq tapeeriaaseqarpat? Kalaallit Nunaanni Qimussertartut Kattuffianuunngitsoq, kisianni illoqarfinni qimussertartut peqatigiiffiit qimussersuarmut peqataatitaqartussanut.**

**Akissut:**

Kommunit najukkani qimussertartut peqatigiiffiit tapiissuteqartarnermini Kulturikkut ingerlatsineq sunngiffimmi sammisassaqaartitsineq pillugit Inatsisartut inatsisaat nr. 5, 6. juni 2016-imeersoq tunngavigisarpaat. Inatsisartut inatsisaani § 9, imm. 1 naapertorlugu Naalakkersuisut kommunalbestyrelsillu makkununga tapiissuteqarsinnaapput:

- “1) ingerlatanik taakkunungalugu atortussanik inerisaanermut pilersuinerimullu,
- 2) sammisassanik ingerlatsinerimut, tassunga ilanngullugit angalanermi aningaasartuutinit aamma ineqartinneqarnermut aningaasartuutinit matussutissanut,
- 3) peqatigiiffiit kattuffiillu kulturikkut ingerlatsinermik sunngiffimmi sammisassaqaartitsinermik suliaqartut ingerlanneqarnerannut,
- 4) isernermi akiliutissap appaaffigineqarnissaanut, peqataanermut akiliutinit assigisaannullu aamma
- 5) saqqummersitsinerimut allatigullu siammarterinerimut.”

Kommuneqarfik Sermersooq ilanngullugu ilisimatitsissutigaa Kommuneqarfik Sermersuumit tapiissutaasartut najukkani ataasiakkaani kulturikkut suliniutit siuarsarniarneri tapersorsorniarlugit kulturimut tapiissutitut tunniunneqartartut. Kulturikkut kingornussat ataatsimooriaatsittalu attatiinnarnissaat siunertaralugu kulturikkut tapiissuteqartarnerit kommunini maleruagassanik tunngaveqartarput.

Avannaata Kommunian ilanngullugu ilisimatitsissutigaa tapiissuteqaraangamik kommunip tapiissuteqarnissamat ileqqoreqqusaa aallaavigineqartartoq. Inatsisitigut tunngavigineqartartut tassaapput Kulturikkut ingerlatsineq sunngiffimmilu sammisassaqtitsineq pillugit Inatsisartut inatsisaat nr. 5, 6. juni 2016-imeersoq, Timersorneq timigissarnerlu pillugit Inatsisartut inatsisaat nr. 15, 6. juni 2016-imeersoq kiisalu Meeqqat inuusuttullu suliniaqatigiiffinnut init silamilu ingerlatsiviit pillugit Namminersorlutik Oqartussat nalunaarutaat nr. 20, 27. september 1988-imeersoq.

Qeqqata Kommuniata aammattaaq ilisimatitsissutigaa Qeqqata Kommuniani Ilinniartitaanermut immikkoortortaqaqfimmi qinnuteqaatit tiguneqartartut suliarineqarlutillu. Qeqqata Kommunian Timersornermut tapiisarnikkut malittarisassaqaqpoq. Timersornermut tapiisarnikkut malittarisassap iluanippoq Qeqqata Kommuniata Kultureqarnermut tunngasunut tapiisarnermut politikkimi periusaat. Taannalu malinneqarneratigut suliaq Qeqqata Kommuniani pisortaanernut ingerlateqqinneqartarpoq. Tassanilu aningaasat qanoq annertutigisut tapiissutigineqassanersut aalajangersorneqartarluni.

## **Apeqqut 2:**

**Kulturimut Ilinniartitaanermut Timersornermullu Naalackersuisoqarfik Kalaallit Nunaanni Qimussertartut Kattuffianit naatsorsuutini kukkunersuisumit nalunaarsukkamit kukkunersiorneqarsimasunik ukiuni kingullerni sisamani tigusaqarsimava?**

**a. Naamiuppat; Naalackersuisut nunatta karsia aqqutigalugu tapiissuteqartartut aamma ileqqorissaarnertut isiginerpaat naatsorsuutini kukkunersuisumit nalunaarsorneqarsimasumit kukkunersiorneqarsimasunik tigusaqarnikuusimanatik aningaasarpassuarnik KNQK-mut ukiut tamaasa tapiissuteqartarnertik?**

## **Akissut:**

Naalackersuisut ilisimatitsissutigisinnaavaat KNQK-imut naatsorsuutit kukkunersiuqqat tiguneqarsimasut kingullit 2020-meersuummata.

Naalackersuisut erseqqissaatigissavaat qimussertartut kattuffianit KNQK-imit qinnuteqaatit tiguneqartartut eqqarsaatigalugit inatsisit assigiinngitsut tunngavigalugit suliarineqartarmata. Tamatuma malitsigisaanik KNQK-imut tapiissutigineqarsimasut naatsorsorneqartarnerini inatsisit assigiinngitsut tunngavigineqartarput.

Tapeeriaatsit marluk KNQK-ip Naalackersuisunut qinnuteqarfigisinnaasai tullinnguuttuni nassuaatigineqarput, tassunga ilanngullugit tapiissutigineqarsimasunut tunngatillugu naatsorsuutini saqqummiisarnissamik piumasaaqatit.

*Konto pingaarneq 40.95.01 Eqqumiitsuliornermut kulturimullu tapiissutit allat aqqutigalugu tapiissutaasartut*

Konto pingaarneq 40.95.01 Eqqumiitsuliornermut kulturimullu tapiissutit allat aqutugalugu angalanernut aningaasartuutitut tapiissuteqartoqartarpoq. Pingaarnertut kontop 40.95.01-p Tapiissutit allat eqqumiitsuliornermut aamma kulturimut malittarisassatigut Eqqumiitsuliornermik ingerlatsineq pillugu Inatsisartut inatsisaat nr. 11, 6. juni 2016-imeersoq aamma Kulturikkut ingerlatsineq sunngiffimmilu sammisassaqartitsineq pillugit Inatsisartut inatsisaat nr. 5, 6. juni 2016-imeersoq tunngavigai. Qimussimik sukkaniunnermut tapiissutit inatsisini tunngavissami kingullermi tapiissutinik taakkununga tunniussinissamut inatsisit tunngaviusuupput. Qimussimik sukkaniunnermut tapiissutit ingerlatanut tapiissutitut tunniunneqarput, Inatsisartut inatsisaanni § 9, imm. 1, nr. 3, kiisalu § 9, imm. 3 aamma imm. 4 takukkit.

Inatsisartut inatsisaat naapertorlugu Naalackersuisut kulturimik sunngiffimmillu sulialinnut tapiissutaannik tiguisut tapiissutit siunertamut aningaasaliiffigitikkusutamut atorneqarsimanerinek uppersaallutillu qinnuigineqarnerup kingorna uppersaasersuisussaapput, § 40 takuuk. § 40, imm. 2-mi aalajangersarneqarpoq tapiissutinik atuinerup uppersarneqarnissaa uppersaaserneqarnissaa, taakkununga ilanngullugu naatsorsuosiornissamut kukkuniuissamullu piumasaqaatit Naalackersuisut malittarisassaliorsinnaagaat. Piginnaatitsissulli tamanna suli atorneqanngilaq. Tamanna ima ilaatigut paasineqassaaq naatsorsuutit naalagaaffiup akuerisaanit kukkuniuissamut suliarineqartarnissaanik massakut suli piumasaqaatitaqanngitsoq.

Qinnuteqaatit tiguneqaraangata Naalackersuisoqarfiup malittarisassat atuuttut naapertorlugit tapiiffigitinnissamut piumasaqaatit qinnuteqaatit naammassisimaneeraat nalilersortarpei, matumani suliniutit missingersuutaat ilanngunneqarsimasut Naalackersuisumut inassuteqaasiortugit aalajangiussassatut saqqummiutinnginnerani ilanngullugit. Aamma tapiissutit tunniunneqarnerini aningaasaliinerup allaaserineqarnerani naatsorsuutinik saqqummiussinissamik piumasaqaat allassimasarpoq, tamannalu qimussinik sukkaniunnermut tapiissutinut aamma atuuttarpoq.

Naalackersuisut isumaqarput KNQK-ip naatsorsuutit saqqummiuttagai konto pingaarneq 40.95.01 Eqqumiitsuliornermut kulturimullu tapiissutit allat aqutugalugu tapiissutaasartuni piumasaqaataasunut kiisalu kontomit tassannga tapiiffigineqarnissamut piumasaqaatinut naapertuuttut. Tassunga atasumik KNQK-p angallannermut aningaasartuutit akiligassartaat uppersaatitut aamma nassiuttarpei, taamaalilluni qimussinik sukkaniunnermut siunertarinqartumut tapiissutit atorneqarneri aamma uppersarsinnaallugit.

#### *Tipsernermit lottornermillu aningaasaliissutinit tapiissutit*

Tipsernermit lottornermillu aningaasaliissutinit tapiissuteqartarnermi Inatsisartut Inatsisaat nr. 10, 22. november 2011-meersoq kiisalu aningaasanik agguaassisarneq pillugu tapeeriaatsit, tapiiffigineqarnissamut piumasaqaatit il.il. pillugit Namminersorlutik Oqartussat nalunaarutaat nr. 16, 11. maj 2020-meersoq tunngavigineqartarput. Nalunaarummi § 8 naapertorlugu tapeeriaatsit marluupput tassalu suliniutinut tapiissutit aammalu ingerlatsinerneq tapiissutit.

Suliniutinut tapiissutit nalunaarummi § 9, imm. 1 naapertorlugu tassaapput suliniutinut piffissalikkanut tapiissutit aalajangersimasumik siunertaqarlutillu

naammassineqartussat. Tapiissutit missingersuutigineqartut 75 %-ii angullugit tapiisoqarsinnaavoq § 9, imm. 2-lu naapertorlugu, annerpaamillu 200.000 kr.-inik tapiissuteqartoqarsinnaalluni.

Ingerlatsineranut tapiissutit nalunaarummilu § 10, imm. 1. naapertorlugu tassaapput ingerlatsineranut suliniutinullu ingerlaavartunut aningaasartuutaasimasunut tapiissutit, tassunga ilanngullugit sulisunut, ininut, allaffeqarnermut aningaasartuutitut tapiissutit. Nalunaarummilu § 10, imm. 2 naapertorlugu annertunerpaamik 90.000 kr.-inik tapiissuteqartoqarsinnaalluni.

Nalunaarummi § 21 naapertorlugu suliniutinut tapiissutinik tigusaqartup, suliniutip naammassineraniit kingusinnerpaamik qaammatit pingasut qaangiunneranni tapiissutit atonerannut naatsorsuutit atsiukkat nassiutissavai. § 21, imm. 2-mi aalajangersarneqarsimavoq minnerpaamik 150.000 koruunit tapiissutigineqarsimappata, naatsorsuutit kukkunerisuiusumit naalagaaffimmit akuerisaasumit imaluunniit kukkunerisuiusutut nalunaarsukkamit kukkunerisiorneqarsimassasut.

Nalunaarummi § 24 naapertorlugu ingerlatsineranut tapiissutinik tiguisut tapiissutit tunniunnerisa ukiup ataatsip qaangiunneratigut kingusinnerpaamik 1. juni ukiumoortumik naatsorsuutinik kukkunerisuiusullu tapiliussaaniq aqutsisumut nassiussissapput. § 24, imm. 2-mi aalajangersarneqarsimavoq naatsorsuutit kukkunerisuiusumit naalagaaffimmit akuerisaasumit imaluunniit kukkunerisuiusutut nalunaarsukkamit kukkunerisiorneqarsimassasut.

Aningaasanoorutit ilaannit aningaasanik agguaassisarneq pillugu inatsisartut inatsisaat 10, 22 november 2011-meersoq aammalu Aningaasanoorutit ilaannit aningaasanik agguaassisarneq pillugu tapeeriaatsit, tapiiffigineqarnissamut piumasaqaatit il.il. pillugit Namminersorlutik Oqartussat nalunaarutaat nr. 16, 11, maj 2020-meersoq naapertorlugit Naalackersuisut qinnuteqartunut kukkunerisuiusumit akuerisamit naatsorsorneqarsimasunik naatsorsuutiminnik nassitsisimangitsunut tapiissuteqarsinnaangillat. Qinnuteqartunut kukkunerisuiusumit akuerisamit naatsorsorneqarsimasunik naatsorsuutiminnik naalackersuisoqarfimmut nassitsisimangitsut qinnuteqaataat itigartinneqartarput.

### **Apequt 3:**

#### **Naalackersuisut tassunga tunngasumik allamik oqaasissaqarnerpat?**

#### **Akissut:**

Naamik, Naalackersuisut allamik ilanngussassaqaqanngillat.

Inussiarnersumik inuulluaqqusillunga

Aqqaluaq B. Egede